



Ulloq: 3. februar 2026
Allaffik: Nordatlantkontoret
Sul.sulia: Ditte Konradsen
Refsgaard
Suliap normua: 2025-04791
Takussutissiaq: 3909084

E Q I K K A A N E Q

Kalaallit Nunaanni eqqartuussisarnermik inatsisip allanngortinneqarnera pillugu inatsit (Pinngitsaaliilluni akuliunnerit pillugit eqqartuussinerni najuutinngikkaluarluni atortut elektroniskiusut atorlugit peqataaneq, oqarasuaatikkut oqaluussisumik naalaarneq aamma oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit aalajangiinermik pissarsiniarnermut suleriaaseq piuminarsagaq, nutarterinerit allat il.il.)

Kalaallit Nunaanni eqqartuussisarnermik inatsisip naleqquttumik annertussusilerlugu, qallunaat eqqartuussisarnermik inatsisaanni piffissami 1. juni 2023-imiit 31. december 2024 ilanngullugu allanngortitsinernik suliarineqarsimasunik, nutarterneqarnissaa inatsisissatut siunnersuummi matumani siunertarineqarpoq. Inatsisissatut siunnersuut aamma inatsisip ullutsinnut naleqquttuunissaata aamma oqartussaasut pisariaqartitaannut naleqqussarneqarnissaasa naammassineqarnissaannik, Inatsiseqarnermut ministereqarfiup suliassaqarfiani oqartussaasut arlallit siunnersuutigisimasaannik allanngortitsinerit arlaqartut naammassineqarnissaannik siunertaqarpoq.

Tamanna tunngavigalugu qallunaat eqqartuussisarnermik inatsisaannut naleqqiullugu taaguutit assigiissarneqarnissaat siunertaralugu, taama tulleriillutik, Nunatsinni Eqqartuussivimmi aamma Nunatta Eqqartuussisuuneqarfiani, eqqartuussisut qullersaata atorfiata taaguutaata præsidentimut allanngortinneqarnissaa *siullertut* siunnersuutigineqarpoq.

Inatsisissatut siunnersuutikkut malittarisassamik nutaamik
eqqussisoqarnissaa *aappaattut* siunnersuutigineqarpoq, tamatumalu
kingorna inuk, akuusumut ukiukitsumut angajoqqaatut akisussaaitaasup
suliamik saqqummiussisimanerani imaluunniit
suliareqqitassanngortitsinerani, tamakkiisumik imaluunniit
ilaannakoortumik suliamut aningaasartuutit taakku, akuusup ukiukitsup
akilissallugit pisussaaffigisaraluisa, akilissagai, eqqartuussiviup
aalajangersinnaassavaa. Suliami paasissutissat aamma ukiukitsoq pillugu
paasissutissat, suliami takussutissiani takuneqarsinnaasut, imaluunniit
allakkut eqqartuussivimmuut saqqummiunneqartut, aallaavigalugit
eqqartuussiviup aalajangiinera aalajangerneqartussaassaaq.

Politiit pinerluttoqarsimaneranik paasiniaanerminni sakkuutaannut
tunngatillugu aamma malittarisassat ullutsinnut naleqquttuunissaasa aamma
sunniuteqarluartuunissaasa qulakkeerneqarnissat siunertaralugu,
eqqartuussivinni pinerluttulerinermik sulianut atatillugu ingerlatsinernut
tunngatillugu, allanngortitsinerit arlallit *pingajuattut*
siunnersuutigineqarput.

Politiit suliamilu illersuisoq ivertitaq eqqartuussisarnermik inatsimmi
kapitali 36 aamma 37 malillugit pinngitsaaliilluni akuliunnerit pillugit
eqqartuussinerni najuutinngikkaluarluni atortut elektroniskiusut atorlugit
peqataasinnaanerinut periarfissap eqqunneqarnissaa, tassunga atatillugu
siunnersuutigineqarpoq. Periarfissap taassuma eqqartuussinerni,
taakkunani akuliunnerup imaluunniit akuliunnerit suliarineqarsinnaanerit
piffissaliussap sivitsorneqarnissaa taamaallaat isummerfigineqassalluni,
pingaarnertut atorneqarnissaa naatsorsuutigineqarpoq.

Eqqartuussinerni aallarnersaataasuni, taakkunani politiit
akuliussinnaanersut eqqartuussiviup isummerfigisussaallugu, takkulluni
eqqartuussineq utaqqineqarsinnaanngippat, imaluunniit allakkut
naleqquttuussanngippat, matumani angallannermi piffissaq
atorneqartussaq aamma angalanermi aningaasartuutit
eqqarsaatigineqarneri ilanngullugit, taamaattumik najuutinngikkaluarluni
atortut elektroniskiusut atorlugit peqataasinnaanerup taamaallaat
periarfissaanissaa naatsorsuutigineqarpoq.

Pinerluttulerinermi inatsimmi erseqqinnerusumik taasanik ingasattumik
aamma navianartumik unioqqutitsinernut arlalinnut
pinerluttoqarsimaneranik paasiniaanermut atatillugu oqarasuaatikkut

oqaluussisunik naalaarneq imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit eqqartuussiviup aalajangiinerani, oqarasuaatip normuinit immikkut ittunut taarsiullugu, inummut tassunga akuliunnermut tunngassuteqarsinnaaneranut periarfissap eqqunneqarnissaa aammattaaq siunnersuutigineqarpoq. Kisianni aalajangersagassatut siunnersuutigineqartup sulisaaseq piuminarsassavaa, taamaalilluni politiit taamaallaat sioqqutsilluni aalajangiinermik ataatsimik pissarsinissaq pisariaqartissalissavaat. Aalajangersagassatut siunnersuutigineqartoq malillugu inummut aalajangiineq tunngavigalugu oqarasuaatikkut oqaluussisunik naalaarneq imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissanik pissarsiniarnermut piumasaqaatit nalinginnaasut suli naammassineqarsimasussaassapput, soorlu aamma ilaatigut suliami pissutsit piviusut, taakkunani, oqarasuaatit normunit pineqartunit inummit, akuliunnermut tunngasumit, nalunaarutunik tunniussisoqarnera imaluunniit inummut tunniussisoqarnera, pissutsit aalajangersimasut pissutigalugit ilimaginnineq tapersorsorneqarluni, pillugit eqqartuussivimmit tulliusumik nalunaarutiginnineq pisussaassasoq. Sioqqutsilluni inummut aalajangiineq tunngavigalugu oqarasuaatikkut oqaluussisunik naalaarnerup imaluunniit oqarasuaatit sorliit piffissami aalajangersimasumi oqarasuaammut aalajangersimasumut atassuteqarsimanersut pillugit paasissutissanik pissarsiniarnerup inatsisinut naapertuussussaa pillugu apeqqu, illersuisumit ivertinneqartumit eqqartuussivimmut saqqummiunneqarsinnaavoq.

Tamanna pinerluttoqarsimaneranik paasiniaannermut pingaaruteqarluinnarpat, isertuussaasumik arsaarinninnermik suliaqartoqarsinnaaneranut erseqqissumik periarfissaliissutitalimmik aalajangersakkamik nutaamik eqqussisoqarnissaa, tamatuma saniatigut siunnersuutigineqarpoq. Eqqartuussisarnermik inatsimmi § 415, imm. 2 malillugu isertuussaasumik uppernarsaatini ujaasisarnermut ingerlatseriaatsimi malittarisassat assingi isertuussaasumik arsaarinninnermut atuutissapput. Assersuutigalugu nalunaaruteqarneq pinerluttoqarsimaneranik paasiniaannermut ajoqutaasusnaanera pissutigalugu, imaluunniit politiit pinerluttoqarsimaneranik paasiniaannerminni periaasaasa isertuussaasut illersorneqarnissaasa taamaaliortoqarnissaa akerlerippagu, politiinit noqqaassuteqarneq malillugu, eqqartuussiviup isertuussaasumik arsaarinninneq pillugu

aalajangiisussaasusnaanera imaluunniit tulliusumik taassuminnga akuersissuteqarnissaa, inummut, akuliunnermut tunngassuteqartumut, illersuisumik ivertitsisoqartussaasusnaanera, aamma tulliusumik akuliunneq pillugu nalunaarutiginnittoqartusnaanera, malittarisassat taakku ingammik kingunerissavaat.

Ingerlatseriaatsinut tunngatillugu, pinerluttulerinermik suliat suliarineqartarnerisa siuarsarneqarnissaat siunertaralugu, pingaarnertut isumaqatigiinniarnissamut sioqqutsisumik piffissamik aalajangersaanissamut periarfissaliissutip eqqunneqarnissaa siunnersuutigineqarpoq. Tamanna naleqquttutut isigineqarpat, unnerluussisussaataasut unnerluussummik tunniussinissaat sioqqullugu, noqqaassuteqarnikkut suliami pingaarnertut isumaqatigiinniarneq sioqqutsisumik piffissalernerqarsinnaasassoq, siunnersuutip kinguneraa. Sioqqutsisumik piffissaliinissaq pillugu noqqaassut, unnerluussisussaataasumit aamma pissutissalimmik pasisamit (illersuisumit) saqqummiunneqarsinnaasussaavoq. Pinerluttulerinermik suliat ataatsimut sivisussusigisartagaasa appartinneqarnissaat aalajangersakkap siunertarivaa.

Akiliisitsissutinik suliat ingerlanneqartarnerinik piuminarsaaneq Kalaallit Nunaanni eqqunneqassasoq, aammattaaq siunnersuutigineqarpoq, taassumalu suliani, unnerluunneqartup suliap eqqartuussivimmi suliarineqarnissaa erseqqisumik noqqaassutigisimanngippagu, aamma pissutsit assigiinngitsut takkutinngitsoornermi eqqartuussummik nalunaaruteqarnissaq akerlilinngippassuk, takkutinngitsoornermi eqqartuussummik eqqartuussiviit eqqartuussinnaanerat periarfississavaa.

Nunatta Eqqartuussisuuneqarfiani sulianik allanik suliarinnittarnermi piffissap sivikillineqarnissaa siunertaralugu, saqitsaannerit pillugit suliani eqqartuussinermi nammineq sinnerluni pisinnaatitaasut akissarsiaat, annerpaamik 50.000 kr.-inut aalajangersarneqartut, pillugit Nunatsinni Eqqartuussiviup aalajangiinerinerinik aalajangeqqitassanngortitsinermut killiliineq eqqunneqassasoq, *sisamaattut* siunnersuutigineqarpoq. Taamaattoq, pissutsit immikkut ittut tamanna pissutissaqartippassuk, Ingerlatitseqqinnissamik aalajangiisartut aalajangeqqitassanngortitsinermut akuersissuteqarsinnaassapput.

Nutarterinissaq siunertaralugu, Inuit Pisinnaatitaaffii pillugit Europami Eqqartuussivimmit inaarutaasumik eqqartuussutit, Danmarkip akuuffigisai,

eqqartuussutigineqarsimasut malinniarlugit pinerluttulerinermik suliani suliareqqitassanngortitsisinnaaneq pillugu suliareqqitassanngortitsineq pillugu aalajangersakkamik nutaamik eqqussisoqarnissaa, aammattaaq *tallimaattut* siunnersuutigineqarpoq. EMD-mit eqqartuussutip malinneqarnissaa pissutigalugu suliareqqitassanngortitsinerup qinnuteqaatigineqarsimanera apeqqutaatinnagu, taakkunani malittarisassat atuuttut malillugit Den Særlige Klageretip suliat suliareqqitassanngortinneqartarnerinut piginnaasaqarfiata avataaniilersussat pinnginnissaasa qulakkeerneqarnissaat, matumani siunertarineqarpoq. Pinerluttulerinermik suliat, taakku najukkani eqqartuussivinni, Nunatsinni Eqqartuussivimmi, Nunatta Eqqartuussisuuneqarfiani imaluunniit Eqqartuussiviit Qullersaanni aalajangerneqarsimanerat apeqqutaatinnagu, suliareqqitassanngortinneqarsinnaapput.

Naggataagut, pisinermi isumaqatigiissutit digitaliusumik atsiornikut, akiliisitsisarnermut eqqartuussivimmi atuutsinneqarsinnaanissaat siunertaralugu, eqqartuussiviit avaqqullugit allakkatigut isumaqatigiissuteqarnerni aamma akiitsut allagartaanni digitaliusumik atsiorneqartuni, takussutissiap allakkatigut assilillugu sanaqqinneqarnera akiliisitsisarnermut eqqartuussivimmut tunniunneqarnissaat *arferngattut* siunnersuutigineqarpoq.